

## De Startsiet gestalten



Gaht Se wedder op „Finchens Siet“. De Siet schall nu schöner warrn.

### Hinnergrunntfarv

Witt is ja nich verkeert, avers ok beten langwielig. Bunt is beter!

### Hinnergrunntfarv


- Wählt Se Menü **Format | Hintergrund** (süh Bild rechts).
- De staatsche Dialog **Seiteneigenschaften** geiht apen, un twoors op de Registerkoort **Hintergrund**. In de Midd wählt Se bi **Farben** ut de Utklappliste **Hintergrund** en annere Farv.




- Avers nich jichtenseen! De 16 Farven, de dor anbaden warrt, laat us alle kooht. Staats dat wählt Se **Weitere Farben...**
- Nu geiht en lütten Dialog op, den Se entweder al kennt orrer sik merken schullt. So, as dat hier ut-süht, warrt in't ganze Windows Farven utwählt! Klickt Se op een vun de bunten Immenwaven, denn warrt de Farv utwählt.

*Hier wählt Se en annere Hinnergrunntfarv.*

- Man wenn Se keen vun de Farven in de Immenwaven gefällt, denn köönt Se liekers an noch mehr Farven kamen: Klickt Se op **Benutzerdefiniert**. Se kaamt denn in en Dialog, 'neem Se allens an Farven to Verfüög steigt, wat de Grafikkoort vun SeEhrn PC tostann bringt – süh Bild op de neegste Siet.



*Noch veel mehr Farven gifft dat in düssen Dialog...*



...un in düssen Dialogo eerst recht!


Se köönt in't Farvenspektrum dör Klick en Farv utsöken un denn de ehr Helligkeit mit den Schuuvregler an'n rechten Rand verännern. Wenn Se de Farv gefallt, övernehm't Se de mit **OK** un klickt Se sik denn mit **OK** dör alle apen stahn Dialoge, bet de alle weg sünd.

## Hinnergrunnbild

En reine Farv is schön, avers en Bild as Siedenhinnergrunn is villicht noch een wat beterer Blickfang. So leggt Se en Bild in'n Hinnergrunn:

### Hinnergrunnbild

- Wählt Se, as baven, Menü **Format | Hintergrund**. De Dialogo **Seiteneigenschaften** warrt op de Registerkoort **Hintergrund** apen maakt.
- Sett Se nu teemlich wied baven op düsse Registerkoort den lütten Hoken bi **Hintergrundbild** – süh Bild rechts.



Durchsuchen...

- Nu klickt Se op **Durchsuchen**. Denn geiht 'n Dialogo op, de jüst so ähnlich utsüht as de normale Öffnen-Dialogo.
- In düssen Dialogo gaht Se in den Ordner, 'neem Se dat Hinnergrunnbild liggen hebbt, un wählt Se dat ut.
- Denn klickt Se sik mit **OK** dör de restlichen apen stahn Dialoge.


Un woans süht dat nu ut? Tja, SeEhr Hinnergrunnbild warrt op de Siet „kacheln“! Dat heet, dat warrt jümmers wedderhaalt, bet de Siet vull is. So hebbt Se sik dat nich vörstell't? Se hebbt een einzig, groot, wunnerschön Reesenbild wullt, so as dat ok op SeEhr Desktop is? Vergeet Se dat! Süh Kassen.

### Bi Hinnergrunnbiller beachten:

För Hinnergrunnbiller gelt, wat för alle Biller in't WWW gelt: Se schallt spaarsam ween. Also mutt de Datei lütt ween. Een einzig groot, prächtig, fien oplööstes Bild as Hinnergrunn is dordör unmöglich. Dat würr minutenlang laden – nüms tööv't dat af.

- Hinnergrunnbiller sünd lütt, mehrst ok vun jümehr Afmeten. Se sünd so maakt, dat se good utseht, wenn se wedderhaalt („kacheln“) warrt. De Övergängen an de Bildränder sünd doran anpasst.

- Hinnergrunnbiller sünd mehrst nich gegenständlich, man reine Ornamente orrer Muster. Gegenständliche Biller kunnt de Bekieker verwirren un seht faken verdwatscht ut, wenn se „kacheln“ warrt.
- Hinnergrunnbiller hebbt keen to dullen Kontrasten – de Schrift in’n Vörrergrunn schall ja noch good to lesen ween.



*Düsse Wolken-Hinnergrunn is ideaal – keen Övergang an’n Bildrand is to sehn, un de Vörrergrunn is good to erkennen. Dat Hinnergrunnbild is levig, stöört avers nich.*

Surft Se mal to en Söökmaschien un söökt Se na kostenlose Galerien in’t Web, ’neem Hinnergrunndateien anbaden warrt! Dat giffet Dusen-de gode Hinnergrunn, de Se ümsüß rünerladen köönt!



Wenn Se SeEhr Siet dat neegste Mal spiekert, warrt Frontpage Se fragen, wat dat de Hinnergrunndatei in’n sülvigen Ordner afleggen schall usw. Verlööv’t Se em dat, Se kennt dat ja al.

## Optelln


Nu kümmt ünner dat Bild en lütt Optelln. Dor staht dree Püknit in, de achterna to Hyperlinks warrt – to Verwiesen na dree annere Sieden, de wi ok noch erstellt, nämlich Ünnersieden vun SeEhr Homepage. De Hyperlinks warrt in Deel 3 vun düssen Workshop besproken.

De Optelln löppt jüst so as in Word:

### Optelln erstellen

- Maakt Se’n poor lerrige Afsätt mit **Enter (Return)**.
- Wenn Se noch zentreert schreevt, klickt Se nu op dat Symbol **Linksbündig**.
- Stellt Se sik en anstännige Schriftgrött in, t.B. **5 (18 pt)**.
- Nu klickt Se op dat Schaltflach mit dat Optelln-Teken **Aufzählungszeichen** op de Symbolliest.
- Dor kümmt en lütt Boller in’n Text un dorachter de Schrievmarke. Schreevt Se den Naam vun de eerste Ünnersiet, denn **Enter (Return)**.
- Schreevt Se nu de Naams vun de annern Ünnersieden, de Se plaant. Sluut Se jümmers mit **Enter (Return)** af.
- Wenn Se de Optelln beenden wüllt un wedder normaal widderschrievn wüllt, drückt Se einfach tweemal **Enter (Return)** – jüst as in Word.


*De Optelln in’n Rohkostand*



Also dat süht ja nu noch nich to'n Högen ut. De Boller veel to lütt, allens to wiet links, un de Reegn to dicht op'nanner. Dat mutt anners warnn, klaar.

## Afstand twüschen Afsätt

- Markeert Se sik de drie Pünkt (Afsätt) vun't Optelln.
- Wählt Se Menü **Format | Absatz...** (süh rechts)
- In dat Dialogfenster wählt Se in'n Beriek **Abstand** en Afstand **Vor** orrer **Nach** un stellt den t.B. op 10 in. **OK**.



Abstand

Vor:

Nach:

Wort:


*So warrt de Absatzafstand instellt*

Düsse Method is veel beter un eleganter, as mit **Enter (Return)** mang de enkelten Afsätt tokehr to gahn! Mit düssen Handgriep köönt Se veel finerere Afstänn kriegen.


Nu mutt dat Ganze mehr in de Midd. Dorto verwennt wi den Intoog.

## Intoog

- Markeert Se alle drie Pünkt (Afsätt) vun't Optelln.
- Klickt Se poormaal op dat Symbol **Einzug vergrößern** op de Symbolliest.




So köönt Se de Optelln mehr in de Midd rücken, ahn dat dat zentreert warrt. Zentreerte Optelln seht nämlich dösing ut.


Wenn Se to wied inrückt sünd, benütt Se dat Symbol **Einzug verkleinern**. 

## Schönere Optelln-Teken

De Standard-Boller seht beten lütt un schedderig ut.

### Biller as Optellnteken

- Markeert Se wedder alle drie Pünkt (Afsätt) vun't Optelln.
- Wählt Se Menü **Format | Nummerierung und Aufzählungszeichen**.
- Word-Kenner sünd nu bannig op'n Pott sett – se harrn op de Reesenutwahl vun Word luurt, Smileys un so'n Tüüchs. Puustkoken, dat giff't hier nich! Maakt nix, gaht Se eenfach op de Registerkoort **Grafische Aufzählungszeichen**.
- Klickt Se de Opschoon **Bild angeben** an. 
- Dorna klickt Se op **Durchsuchen** (süh Bild rechts).
- Hier köönt Se ut SeEhr egen Billerdateien en Grafik utwählen, de denn as Optelln-Teken inföögt warrt.



Wat för Grafiken hebbt denn dat Tüüch för'n Optellnteken? Na, de mööt natüürlich lütt ween; dat köönt Pünkt ween, avers ok Piktogrammen un so. Besünners schön is dat, wenn de Grafik nich op Witt steiht, man wenn de Hinnergrunn vun SeEhr Siet dörschient. Dorto mööt Se en Bild in't GIF-Format mit transparenten Hinnergrunn maken orrer utsöken. – Wenn Se keen hebbt, söökt Se in't Web na solk Biller! Mit de Söökwoör „gif gallery“ orrer „free gif“ in en internaschonaale Söökmaschien finnt Se basig veel!

Wi hebbt dat schematische Bild vun en Amsel nahmen un orrig wat lütter maakt. In beed Biller seht Se dat as Optellnteken – links vör'n witten Hinnergrunn, rechts vör'n transparenten Hinnergrunn.



*'n Bild as Optellnteken – links op witten, rechts op dörsichtigen Hinnergrunn*

Wenn de Text dat Optellnteken to dull op de Pell rückt, schuuvt Se em eenfach mit de **Tab**-Taste beten wat wieder vun't Optellnteken weg. (De **Tab**-Taste is op de Tastatur heel links de veerte Taste vun nerrn.)

## Siet testen

Betherto erstellt Se SeEhr Siet un verlaat sik eenfach dorop, dat se in't Web jüst so utsüht. Stimmt dat denn ok? Dat köönt Se pröven. Dorto benütt Se nu dat Register vun de Siedenansichten links nerrn an't Frontpage-Fenster.

### Testen „light“

Links nerrn gifft dat dree lütte Schaltflächen **Normal**, **HTML** un **Vorschau**. Klickt Se nu op dat Schaltfläch **Vorschau**. So, as dat hier utsüht, warrt SeEhr Siet later in't Web utsehn. Versöök Se mal, hier wat to ännern – dat geiht nich. Dat is wohrafftig bloots en Vörschau. To'n Bearbeiten vun'e Siet gifft dat de Ansicht **Normal**.



Se köönt also jümmer twüschen **Normal** un **Vorschau** hin un her schalten, wenn Se seker gahn wüllt, dat allens anständig utsüht.

### Verantwortungsvull testen

So, as dat in de **Vorschau** utsüht, warrt SeEhr Siet ok later in't Web utsehn – *wenn* de Besöcker, de dat ankiekt, en Browser vun de Firma Microsoft benütt (t.B. den Internet Explorer) un desülvige Billschirmoplösung instellt hett as Se nu! Wenn nich, denn köönt Se nich seker ween, dat de Siet good utsüht.

De ünnerscheidlichen Websiedenbekieckprogramme, also de Browser, de op'n Markt sünd, verhollet sik alle en lütt beten ünnerscheidlich. Desülvige Websiet warrt op verscheden Browser nienich exakt glik utsehn. De Browser vun Microsoft warrt an'n mehrsten

verwennt, avers de Browser vun Netscape un Opera kaamt ok faken vör, un jichtenswo giff dat jümmers so lütte Exoten-Browser – un dat allens in ünnerscheidliche Verschoonen!

Noch leger is dat mit de Billschirmoplösung. 'keen en groten Monitor hett, laat sik mehrst 1024 x 768 orrer mehr Bildpünte wiesen; bi lütere Monitoorn sünd dat mehrst 800 x 600 Bildpünte.

Uns Siet is noch nich heel komplizeert un warrt sachs meist överall good utsehn. Avers wenn Se later mal komplexere Websieden opstellt un weten wüllt, woans SeEhr Websiet för de verscheden Surfers op de Welt utsüht, denn riekt de Vorschau in Frontpage nich. Gaht Se denn so vör:



### Profeschonell testen

- Beschafft Se sik je een öllere un een niegste Verschoon vun alle Browser, de begäng sünd. Browsers sünd mehrst ümsüß, dat köst also nix. De niegsten Verschoonen sünd meist jümmer op de CDs vun Computermagazinen, un in'n Notfall köönt Se sik de in't Web rünerladen.
- Maakt Se in elk Browser SeEhr Datei index.htm apen, t.B. dör den Befehl **Datei | Seite öffnen**, un prüvt Se ehr.
- Schalt Se SeEhr Billschirmoplösung üm un prüvt Se nochmal in alle Browser. Se schullt tominnst in de Oplösungen 800 x 600 un 1024 x 768 testen.


### Woans kann ik denn de Billschirmoplösung ümschalten?!

- Laat Se sik den lerrigen Desktop-Hinnergrunn wiesen.
- Ropt Se dor dat Kontextmenü op, d.h. klickt Se mit de rechte Muustast.
- Klickt Se den Menüpunkt **Eigenschaften** an.
- De Dialog **Eigenschaften von Anzeige** kümmt. Gaht Se op de Registerkoort **Einstellungen** (süh Bild neegste Siet).
- Dat Wichtigste is hier de **Bildschirmauflösung**. Ännert Se de mit den Schuuvregler. **OK**.

*Dat Kontextmenü vun'n Desktop. Nu op Eigenschaften klicken*



*Hier köönt Se de Oplösung is faste Stopen ännern. 800 x 600 un 1024 x 768 sünd de wichtigsten*




**Op düsse Registerkaart warrt de Instellungen für den Billschirm drapen**

- Ünner Windows XP warrt de Billschirm kort swatt, un denn is allens trecht, de Oplösung is ännert. Ünner öllere Windows-Verschoonen mööt Se tovöör noch poor Sekerheitsdialoge bestätigen.

Un wenn dat in'e Grütt geiht? – Wenn SeEhr Billschirm na dat Ümstelln swatt blifft, denn röögt Se sik einfach nich! Nich wild rümmerklicken orrer op de Tasten kloppen! Driest goor nix daan. Na en lütte Tied warrt Windows wies, dat dor wat scheap lopen is, un maakt dat Ümstelln vun sülvst rückgängig.

## HTML-Ansicht

Wüllt Se weten, wat Frontpage wirklich deit? Denn klickt Se mal in't Register vun de Ansichten op HTML.



HTML is de Programmierspraak, 'neem Websieden in schreven warrt. Un dor seht Se, woto dat Frontpage giff:

Düsse komische Programmcode warrt automaatsch in'n Hinnergrunn erstellt. Dat maakt Frontpage för Se. Süß möten Se dat sülven daan! Fröher weer dat so. Dor harr een HTML lehren möten, dat een Websieden erstellen kunn. – Se brukt düsse Ansicht nie mehr wedder ansehn, wenn Se nich wüllt. Wenn Se avers doch wüllt, denn köönt Se af un to wedder rinkieken, dat Se seht, woans de Code wasst. Denn dat, wat dor nu steiht, beschrift ja bloots uns relativ simple Siet; later warrt dat veel mehr ween.